



Sud Bosne i Hercegovine
Суд Босне и Херцеговине

Broj: S1 3 Iž 040664 21 Iž
Sarajevo, 17.06.2021.godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka kao predsjednika vijeća, Zvezdane Antonović i Redžiba Begića kao članova vijeća, odlučujući o žalbi političke stranke Novi bošnjački pokret sa sjedištem u Sarajevu, Zagrebačka 27, koju zastupa Mirsad Ćosić, predsjednik stranke, izjavljenoj protiv odluke Centralne izborne komisije Bosne i Hercegovine broj: 05-01-07-6-1276/20 od 26.05.2021.godine, zbog kršenja Zakona o finansiranju političkih stranaka, u nejavnoj sjednici, održanoj dana 17.06.2021.godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Novi bošnjački pokret, odgovorna što u 2018.godini:

- a) u godišnjem finansijskom izvještaju za 2018.godinu nije iskazala nenovčane donacije, čime je prekršila odredbu člana 5. stav 4. Zakona o finansiranju političkih stranaka,
- b) nije vodila poslovne knjige, čime je prekršila odredbe člana 11. stav 1. i člana 12. stav 1. Zakona o finansiranju političkih stranaka, nije podnijela godišnji finansijski izvještaj Centralnoj izbornoj komisiji BiH u skladu sa Zakonom o finansiranju političkih stranaka i Pravilnikom o godišnjim finansijskim izvještajima političkih stranaka, čime je prekršila odredbe člana 12. stav 4. Zakona o finansiranju političkih stranaka i

pa joj je na osnovu člana 15. stav 2. i primjenom člana 19 stav 1 tačka b), f), i h) Zakona o finansiranju političkih strankama izrečena :

- 1) za povredu iz tačke a) novčana kazna u iznosu od 1.000,00 KM (jedna hiljada konvertibilnih maraka) i,
- 2) za povredu iz tačke b) novčana kazna u iznosu od 1.000,00 KM (jedna hiljada konvertibilnih maraka), odnosno jedinstvena novčana kazna u iznosu od 2.000,00 KM (dvije hiljade konvertibilnih maraka).

Protiv ove odluke žalitelj je blagovremeno uložio žalbu navodeći da pobijana odluka nije utemeljena. Navodi da je uredno poslao finansijski izvještaj za 2018.godinu u kojem je jasno naznačen priliv sredstava u ukupnom iznosu od 10.000,00 KM. Dalje navodi da je u dokumentaciji koja je data na uvid revizorima naznačen i trošak političkog subjekta koje je imao za prijave na Opće izbore 2018.godine, te je time nivelisan priliv sredstava. Kroz poslovne knjige je jasno naznačen priliv i rashod sredstava što dokazuje priložima. Napominje da je žalitelju ovo bio prvi izborni ciklus te da se ta činjenica treba uzeti kao olakšavajuća okolnost za eventualne propuste koji su mogli nastati u vođenju poslovnih knjiga. Smatra da je izrečena kazna previsoka i destimulirajuća za stranački pluralizam u BiH. Predlaže da se žalba uvaži.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilan i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH (u daljem tekstu CIK BiH) je razmatrajući Preliminarni izvještaj službe za reviziju o pregledu godišnjeg finansijskog izvještaja za 2018.godinu političke stranke Novi bošnjački pokret broj 03-07-6-489/19 iz januara 2020.godine, utvrdila da je politička stranka prekršila odredbe Zakona o finansiranju političkih stranaka (Sl. glasnik BiH br. 95/12 sa izmjenama). Izvještaj je dostavljen političkoj stranci na izjašnjenje, koja nije dostavila primjedbe na isti. Nakon toga Komisija za reviziju je sačinila Konačni izvještaj o pregledu godišnjeg finansijskog izvještaja za 2018.godinu broj 03-07-6-489/19 od 12.08.2020.godine.

Navedeno je bilo osnov da CIK BiH po službenoj dužnosti Zaključkom broj 03-07-6-1276/20 od 19.11.2020.godine, pokrene postupak utvrđivanja odgovornosti protiv žalitelja, zbog osnovane sumnje da je ova politička stranka u 2018.godini prekršila odredbe Zakona o finansiranju političkih stranaka.

Iz stanja spisa proizlazi da je CIK BiH cijenila sve dokaze koji su u spisu predmeta-Konačni finansijski izvještaj za 2018.godinu, te utvrdila da je žalitelj prekršio odredbe člana 5. stav 4, člana 11. stav 1, člana 12. stav 1 i 4, te člana 12. stav 3 Zakona o finansiranju političkih stranaka i odredbe člana 15.1 Izbornog zakona BiH. Provedenim dokazima je utvrđeno da žalitelj nije iskazao nenovčane donacije primljene od predsjednika stranke, čime je prekršio odredbe člana 5. stav 4 Zakona o finansiranju političkih stranaka, a koja činjenica je utvrđena iz potpisanih izjava o finansiranju izborne kampanje i finansiranju troškova korištenja poslovnog prostora za političku stranku-žalitelja.

Iz stanja spisa dalje proizlazi da žalitelj nije podnio finansijski izvještaj na način kako je propisala CIK BiH, čime je prekršio odredbe člana 12. stav 4 Zakona o finansiranju političkih stranaka, a u obrascima nije iskazao tačne podatke o prihodima i rashodima, što je suprotno odredbama člana 13, 14, 18, 21, 22 i 23 Pravilnika o godišnjim finansijskim izvještajima političkih stranaka. U odnosu na prihode koje je politička stranka-žalitelj iskazala na Obrascu 3 (izvori finansiranja), a koji je

dostavljen u prilogu žalbe. Služba za reviziju je u Konačnom izvještaju o reviziji navela da prihodi stranke nisu pravilno iskazani u izvještajima. Ugovor o kratkoročnoj pozajmici koji je dostavila stranka, a koji nije predložen revizorima u toku obavljanja revizije, samo potvrđuje da žalitelj nije ostvario prihode u iznosu od 10.000,00 KM, pa samim tim nije ta sredstva trebao iskazati u Obrascu 3-odnosno žalitelj je pogrešno popunio navedeni obrazac, a što sve ukazuje da su žalbeni navodi neosnovani.

Preispitujući pravilnost ožalbene odluke u dijelu visine izrečene novčane kazne, apelaciono vijeće je zaključilo da je za utvrđene povrede pod tačkama a) i b) pravilno izrečena jedinstvena novčana kazna u iznosu od 2.000,00 KM propisana odredbom člana 19. stav 1. Zakona o finansiranju političkih stranaka.

Nadalje iz obrazloženja pobijane odluke proizilazi da je CIK BiH prilikom izricanja novčane kazne kao olakšavajuće okolnosti cijenila činjenicu da žalitelj do sada nije kažnjavao za postupanja protivno Zakonu o finansiranju političkih stranaka. Nadalje je cijenjeno ekonomsko stanje stranke imajući u vidu da je u 2018.godini ostvarila ukupan prihod od 10.000,00 KM. Utvrđena visina jedinstvene kazne za učinjene prekršaje predstavlja minimalni iznos propisane novčane kazne.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
S U D I J A
Sreto Crnjak